



Jumat, 14 Januari 2022
Ogen: Esekiel 24:15-27



Esekiel jadi Usihen



Dibata mpersingeti bangsaNa alu erbage-bage cara. Banci ikataken terkadang unik tapi ibas dampar sideban megati mabai kebiaren la saja man bangsaNa tapi pe man nabi. Nabi me si megati ibahanNa jadi usihen, umpamana Hosea, ndeharana ibahan Dibata gambaren kelasetian Israel man Dibata. Tentuna enda baban simberat siarus ialoken ras bentasi nabi e ibas kegeluhenna.

Renungenta wari end ape nuriken kerna kegeluhen Esekiel selaku nabi, ibahan Dibata kejadi simbelin man jabuna sienda me denggo si jadi nandangi bangsa Israel. Mate ndehara Esekiel tapi la banci itangisina, sora kesi-kesi pe la banci terbegi, ayona pe la banci itutupina. Arus erbulang ras ersepatu ia. Ertina, la banci icidahkenna tanda erceda ate ibas kejadi sib age rupa. Janah enda me pagi jadi man bangsa e, isi jabuna singuda denga pepagi mate me ibas perang tapi la banci itangisi ras ncidahkan tanda ceda ate. Kai si ilakoken Esekiel, bageme si arus ilakoken bangsa enda, Esekiel me si jadi usihenna.

Ibas sada dampar dosa ras kesalahen bangsa e, arus itanggung dengen ialoken Esekiel selaku nabi alu kematen ndeharana sijadi tanda ras usihen bangsa e kerna perbahanenna. Mberat tugas ras ulih si man babanna. Emaka selaku perpulungen, ula kal sipekeng ukurta ibas dosa ras kesalahennta. Erkiteken kita mberat siman baban serayan Dibata. Bahanlah persuruhan Dibata ipapeken jadi alat guna mereken usihen simehuli man kerina perpulungen. Subuk arah pengerana, perbahanen, cara rukur rikut ras kegeluhen ibas jabuna. Sabab ipasu-pasu Dibata ia ibas kerina simehuli ras ketutusenna ngelai perpulungen alu keleng ate Dibata.